

東

華

錄

東華錄

康熙三十六

臣王先謙敬編

臣周倫蕃恭校

秋七月壬申先是郎中包奇等奏自吉林烏喇至黑龍江計丈量共一千一百九十五里應設十四驛諭驛遞關繫緊要凡丈量當以五尺爲度今程途太遠令包奇等再馳驛前往詳加丈量至是包奇等奏自吉林烏喇城至黑龍江城以五尺細丈共一千三百四十里應設十九驛上命如議行復令每驛設壯丁並撥什庫三十名馬二十四匹牛三十頭壯丁自盛京甯古塔所轄各驛柳條邊派出馬牛令盛京戶部照數採買送往○癸酉理藩院郎中蘇巴泰差往蒿齊忒地方稽察蒙古饑民還尙書阿喇尼引奏曰蒿齊忒蒙古被災者約三千人皆以荒野草根爲食一聞遣官稽察

賑救皆環跪舉手加額曰我等殘喘自分旦夕就死今幸天使至我屬得生矣 上顧阿喇尼曰食爲民天朕先有諭旨各處設立常平倉令其儲積以備賑饑今歲畿內秋成大熟正宜詳酌舉行至救荒之道以速爲貴儻賑濟稍緩遲誤時日則流離死喪者必多雖有賑貸亦無濟矣朕每聞水旱災傷卽遣官動支正項錢糧賑濟以此故也今欲救蒿齊忒蒙古若以畿內粟轉運至彼恐不能待可速以拜察地方儲備之粟措支一千石遣爾院賢能官晝夜兼馳運往賑濟○乙亥四川巡撫韓世琦丁母憂命回旗守制○贈貴州殉難守備卜世儼官廕○丁亥頒四書易尙書講義於白鹿洞書院

八月庚寅以姚締虞爲四川巡撫

由左僉都御史遷

○丙申

上駐蹕伊

瑪圖命理藩院尙書阿喇尼等傳諭入旗察哈爾官兵曰爾等自

太宗皇帝時皆編旗分佐領愛養有年今朕巡行邊外講習武

備見爾等人材壯健頗諳體制與京師入旗無異朕所以獎勵爾

等不分內外一視同仁嗣後各宜善爲畜牧力勤農事謹守成法

勿爲盜賊如此不特人皆得所卽朕任使亦有裨益矣爾等其謹

誌之○戊戌以孔興洪爲福建按察使

山直隸口北道遷

○己亥九卿等

議准御史錢珏奏參山西巡撫穆爾賽屬官多收火耗不能察駁

應降三級調用得旨穆爾賽居官何如著大學士九卿從公詳議

將眾論寫明具奏尋大學士九卿回奏山西巡撫穆爾賽爲人樸

實不生事得旨著原參之人指實陳奏○庚子賜翁牛特巴林科

爾沁敖漢諸王貞勒額駙台吉襲衣緋帶及官兵銀幣○辛丑宿

遷縣士民陸爾謐等叩閭言縣有暫加三餉缺額丁銀缺額糧地

及曠土虛糧四項包賠之苦籲請豁免戶部以載在賦役全書徵

收已久應毋庸議得旨朕過宿遷見小民窮苦情形此事爾部再
確議以聞尋議暫加三餉一款徵收與各州縣同不便獨獨至缺
額糧地續報曠土悉予蠲除其缺額丁銀應暫停徵以待招徠之
後起徵從之○丙午 上駐蹕拜巴哈昂阿○賜翁牛特官兵治
道者銀幣○乙卯 上駐蹕烏爾格蘇台○丙辰賜喀喇沁杜稜
郡王扎什及所屬官兵冠服銀幣

九月戊午朔 上至博洛和屯裕親王福全遣人奏 太皇太后

違和奏甫至 上卽星夜回鑾○己未午刻 上還京師趨視

太皇太后慈體已安尙在服藥 上親視進藥侍奉至夜半自是

遂康甯如常○丙寅 上御經筵○戊辰命戶部侍郎蘇赫察眼

淮揚被災地方○己巳命大學士等傳問宗人府左宗正貝子章

泰曰爾衙門既無刑名錢穀要務何以保舉之官甚多章泰引咎

上諭宗人府衙門既無事務且官員甚少著停保舉章泰品行不端著解任○辛未諭吏部督撫藩臬官資相近請託易行每逢大計各省督撫多以藩臬舉報卓異不無結納徇情之弊著通行禁止○壬申九卿等議准御史錢珏遵旨陳奏山西巡撫穆爾賽多加文水等縣火耗嫁女時索屬官禮物革職通判張謙交結該撫家人妄詐屬官財賄布政使那鼐收兌多徵銀兩事請將穆爾賽那鼐及本內有名官役俱提至京師嚴審 上命依議行因問尙書科爾坤曰前者謂穆爾賽爲人樸實不生事孰倡此語耶科爾坤奏曰穆爾賽爲人樸實眾人皆知左都御史陳廷敬敬山西人也先言穆爾賽不生事 上問陳廷敬陳廷敬奏曰臣等同內閣諸臣會議時人止言穆爾賽平常並未言其不生事 上復問科爾坤是誰爲此言者科爾坤奏曰侍郎蔣宏道亦有此言 上問

曰蔣宏道爾所見若何蔣宏道奏曰臣離家年久並不知穆爾賽
行迹 上曰凡人臣事君以竭盡忠誠爲本爾等皆朕信用之人
既已同議今又推諉陳廷敬等是何理也卽今居官者更有如穆
爾賽貪汚者乎如此之人尙謂其不生事嗣後九卿何可信用○
癸酉戶部進呈修成簡明賦役全書體式得旨著九卿從公詳看
議奏○甲戌河道總督靳輔奏康熙二十三年冬臣隨 駕閱河
皇上面諭臣看河南工程臣前赴河南確勘黃河兩岸工程目
前至急之務如考城儀封等縣應築隄工共長七千九百八十九
丈又封邱縣荊隆口應築大月隄三百三十丈又滎澤縣應修築
埽工二百一十丈此工告成不特河南無虞實可爲江南保障下
部議行○乙亥 上遵 太皇太后諭往白塔寺進香適大雨如
注近侍請俟少霽 上曰近因 聖祖母偶爾違和朕心深切憂

慮今已痊愈何憚此一往以慰 慈顏乎遂冒雨行○丁丑以

入代爲內閣學士

由翰林院侍讀學士遷

○己卯以達哈他爲吏部尙書

由

都御史

○庚辰諭大學士等九卿詹事科道令其會議會推本期至

公至正務得眞實今聞九卿會議之事間或不據實具議草率苟且因循而行有此一次立論爭勝以冀下次不與相拂而從之者或有此一次將彼意中之人薦出冀下次將其親朋薦出以相報者或有薦其門生者有薦其同年者有薦其同鄉親友者夫九卿會議會推理宜虛公持論豈可一二人專擅以行且設立科道本欲其凡事從實建言有執拗護庇者卽爲指參也其專擅執拗護庇之人何未見糾劾耶眾議之時亦有一同具議後因其事不當復云彼時我原如此說者如果原議時眾論與伊意不合卽宜將已見明白敷陳另立一議既不另立一議同列職名又稱我曾如

此說是斷斷不可者且今誰可以擅處誰耶卽如張志棟近將九卿題參亦誰如彼何也朕於康熙十八年因此等事曾經有旨申飭可察前旨一併復行傳諭凡事會議不必詢問本省大臣官員若每加詢問或致不肖之人益在地方生事橫行本省督撫地方官無不畏懼且將凡屬會議之事無不屬託本省大臣官員矣政務何由得乎今會議山西巡撫穆爾賽因係滿洲恐致敗露意欲從平易歸結耳若是不於事前豫爲勸戒令其公廉乃不爲豫戒徒於事發之後欲如此結案可乎爾等齊集滿漢九卿大臣傳諭申飭之○辛巳贈故奮威將軍陝西提督王進寶太子太保子祭葬諡忠勇○九卿會議廣東雲南秋審犯人 上曰凡別項人犯尙可寬恕貪官之罪斷不可寬此等人藐視法紀貪污而不悛者祇以緩決故耳若法不加嚴不肖之徒何以知儆此內貪官

耿文明等正法外其餘正犯俱照爾等所議完結○壬午大學士九卿等回奏御史張志棟參九卿因循成風一疏奉旨令臣等明白回奏伏念 皇上激清吏治愛養民生諄諄以砥礪廉隅禁絕積弊告誡臣工卽會議穆爾賽一事奉旨問其居官賢否臣等愚昧無知不能諗其貪劣確蹟據實直陳臣等罪無可道伏乞敕部嚴加議處得旨未與會議九卿詹事科道會同察議具奏○甲申議政王大臣等遵旨議准查墨爾根地方最爲緊要應築城設兵令將軍薩布素及副都統一員駐紮於此黑龍江設副都統一員其駐防五省兵以烏喇甯古塔兵參用先流徙甯古塔烏喇罪人俱入兵數發往旣於墨爾根設兵自須增驛令戶部兵部理藩院各遣官一員自吉林烏喇至墨爾根自墨爾根至黑龍江宜增幾驛定議具奏駐防黑龍江副都統鑄印信給之副都統溫代納泰

孰令駐防黑龍江孰令築城恭候 欽簡 上允行令溫代納秦

駐防黑龍江副都統博定築城兵丁外再量增夫役兼令種地○

乙酉九卿等議准總漕徐旭齡條奏漕糧派索諸弊應令徐旭齡

將歷年派索官員指名題參 上諭大學士等此等弊端相沿已

久必令指名題參則後來督撫難於條奏矣可著該督嚴加禁飭

務在遵行○丁亥以圖納爲山西巡撫由內閣學士遷○吏部議准江蘇

巡撫湯斌奏常州府降調知府祖進朝請留原任應不准行得旨

設官原以愛養民生巡撫湯斌保奏祖進朝清廉地方百姓莫不

同聲懇留可從所請仍留原任以勸廉吏○是月免江南邳州山

西徐溝河南太康等十八州縣水災江西上饒等九縣旱災額賦

有差

冬十月戊子朔命廣東開鑪鼓鑄○庚寅以馬齊爲山西布政使

由內閣侍讀學士選

○吏部議准左都御史陳廷敬奏督撫保舉薦舉府州

縣官須令第一條實填無加派火耗字樣第二條實心奉行上

諭十六條每月吉聚鄉村鄉約講解字樣餘條仍照舊例開具實

蹟應如所請嗣後督撫保舉薦舉府州縣官以將此二條添註冊

內如保舉不實別經發覺者照徇情薦舉卓異例督撫各降二級

調用申詳之司道府等官各降三級調用從之○甲午賜徐憲武

等九十六人武進士及第出身有差○丙申吏部等衙門察議奉

旨問山西巡撫穆爾賽居官賢否時諸大臣不將穆爾賽貪劣據

實陳奏應將大學士勒德洪等各降二級調用九卿科爾坤等各

降三級調用加級紀錄俱不准抵銷得旨勒德洪降二級科爾坤

等降三級從寬留任漢大學士九卿等俱著寬免尋吏部再議大

學士勒德洪應削去太子太傅抵降一級留任從之○丁酉上

學士勒德洪應削去太子太傅抵降一級留任從之○丁酉上

幸南苑行圍○戊戌 上還宮○以布雅努爲山西按察使

由刑部郎

中○理藩院等衙門題厄魯特噶爾丹博碩克圖汗下沙里巴圖

台吉來使伊特木根於北館中毆死正白旗西圖佐領下商人王

治民應論死 上命將伊特木根立決並傳諭厄魯特爾等進貢

來使沿途往返擾害民生搶掠牲畜以致邊境內外百姓困苦者

甚眾朕雖稔知以爾乃遠方之人本不諳中國法紀無知妄行未

遽加罪屢從寬免嗣後貢使往來如有攘奪爲非者爾等率領頭

目並犯法之人皆依中國律令治罪曾經頒旨曉諭今爾進貢頭

目並不嚴束儉從任其擾害將內地人毆死干紀甚矣先以爾等

愚昧頑蠢凡細微攘奪之罪知而宥之乃屢邀寬免頻加曉諭全

不欽遵竟至毆死內地之人今若不按法抵罪日後漸益恣肆大

起爭鬪未可定也用是將毆死人命之伊特木根依律處斬令爾

等識之觀之此後爾等其謹遵成法嚴戢從人毋得肆惡妄行也

○己亥以穆稱額爲內閣學士

由太常少卿遷

○庚子諭大學士等今年

所擬秋決貪官甚多若盡行處決朕心不忍若不行處決貪劣之

徒何以知儆且或有賊犯雖多而情有可矜者或賊犯雖少而情

有可惡者若一律議罪殊屬未便爾等將貪官所犯之情罪分別

輕重朕當酌量定罪○癸卯諭大學士等今見外藩蒙古王貝勒

貝子公台吉等有因徵收年貢羊酒借端多派殊屬累民可酌量

大加裁減歸於至約令其進獻爾等會同該部確議具奏尋議外

藩王以下每歲止貢羊一隻酒一瓶從之○丙午五色慶雲見○

戊申吏部議准原任四川巡撫韓世琦題參酉陽土司運解柎木

遲延查土司無俸可罰應免議

上諭大學士等韓世琦前任江

蘇巡撫居官狼藉後任偏沅巡撫時採辦柎木則稱四川酉陽土

產柎木合式請令蜀省督撫勸諭捐輸及調任川撫又題稱酉陽
地方柎木數目丈尺路遠不便察看請行湖廣督撫就近察明經
部駁察今始委過土司稱大木難運等語前後題奏參差不合著
吏部嚴加議處尋議革職從之○乙酉九卿議覆總河靳輔奏高
寶等七州縣下河築隄高過海潮於沿海口地方挑河白駒場等
處建閘諸工需銀二百七十八萬餘兩請先發銀一半償工俟涸
出額餘官田取佃價償還又高家堰應加密排椿丁頭小埽再於
隄裏挑小河築束水隄共需銀五十三萬餘兩請先撥銀三十萬
兩又黃河兩岸築隄工銀一百五十八萬餘兩請先撥銀五十萬
兩俱應准行 上諭大學士等靳輔題請治下河之法在築隄束
水以注海其工費將涸出田畝取佃價償還等語九卿會議准行
朕思田畝涸出便當與民墾種納糧若取佃價償還恐致累民九

卿等特不敢自爲主張故議准行耳至高家堰幫築工程實爲緊要朕舊歲南巡量度水勢見前人勦築高家堰以捍洪澤諸湖頗有深意今此堰若或潰決則黃河亦難保固至黃河兩岸隄工似在可緩況三工兼舉需費錢糧甚多儻他處或有水旱災荒恐國用不敷難供賑濟之用此事關繫最重爾等當詳議具奏○庚戌兵部議都統公彭春等招撫雅克薩城羅剎應作頭等軍功上諭大學士等此番軍功與明安達禮等不同以歷年不能勦除之寇不久奏績尤屬可嘉此等招撫之功議作頭等尙輕著爲頭等第一軍功將軍薩布素亦著議敘具奏○命南河總督靳輔按察使于成龍馳驛至京師與九卿詹事科道詳議河工事務○諭大學士等近見工部凡於交送物件皆耽延時日抑勒不收弊端滋多此後其嚴禁之可傳諭工部○諭掌膳等官天下之物力有限

當爲天下惜之今酥油乳酒供給有餘爾等會同慶豐司酌量收取足用則已不可過多蒙古甚窮乏取者減少則彼貧人日用可以恒足矣○壬子先是議政王大臣等議巴圖爾額爾克濟農但奏請敕印彼欲永居何地未經聲明應遣大臣曉諭巴圖爾額爾克濟農問明到日定議 上命理藩院尙書阿喇尼前往至是阿喇尼還奏曰臣至巴圖爾額爾克濟農所宣諭 聖旨巴圖爾額爾克濟農曰 皇上以我兄弟族屬離散欲使合處乃係非常殊恩何敢違近者達賴喇嘛亦謂羅卜臧滾布阿喇布坦所居布隆吉爾之地地隘草惡難以容眾不若與濟農同居臣因問濟農欲居何地彼曰欲環居阿喇克山之陰以遏寇盜不使紛擾邊疆令部眾從此地而北當喀爾喀畢馬拉吉里第諾顏之地由噶爾拜瀚海額濟內河姑喇耐河雅布賴山巴顏努魯喀爾占布爾古忒

空廓爾俄壠以內東倚喀爾喀丹津喇嘛之部眾西極高河而居之則咸沐 皇上恩澤而各得安生矣 上命俟遣往達賴喇嘛官員到日再議○癸丑 上幸南苑行圍○乙卯 上還宮

十一月丁巳朔日有食之○給事中楊周憲奏纂修簡明賦役全書無益於民請停止 上諭大學士等楊周憲奏纂修簡明賦役全書將銀之尾數收入釐內糧之尾數收入勺內所增銀米豆麥爲數不多在部議所收者乃州縣之尾數州縣所收者則各圖各里各甲之尾數殊爲繁多不無滋弊且歲造冊籍書吏需索恐致擾民伊言似是不知戶部初題時是何意見果能永久無弊否此事關繫國計民生須求確當方可永久遵行勿以一人以爲可而輒行勿以一人以爲不可而輒止宜虛心公議從容確定務期可垂久遠儻急遽議行不過數年又議更改豈可爲法爾等再公同

確議具奏○設浙江滿洲理事同知一○戊午諭大學士等穆爾賽身爲大吏貪酷已極穢迹顯著非用重典何以示懲且九卿會議穆爾賽事瞻顧徇庇並未詳明議罪真有彌天之術朕不行立斷誰肯執法耶治天下以懲貪獎廉爲要廉潔者獎一以勸眾貪婪者懲一以儆百爾等將此意傳問九卿回奏○己未諭吏部往者康熙十八年曾諭九卿詹事科道一同奏事期於政治得失互相討究雖微員亦得於朕前各抒己見前阿蘭泰於九卿啟奏時言諸大臣跪列於臣之前故未說出則非朕令一同奏事之意矣爾等將此再行曉諭九卿等○戶部議准侍郎蘇赫往勘淮揚水災奏請免被災百姓錢糧將運丁所餘米麥賑濟諭大學士等今國用亦云充足曾令詳察各省錢糧於來歲蠲免夫欲使民被實惠莫如蠲免錢糧朕南巡時觀宿遷邳州百姓生計今年尙可支

持淮揚等處饑民已經被災不能辦納錢糧今僅免本年錢糧百姓霑恩有限須將明歲錢糧一併蠲免庶於民大有裨益至直隸各省遇災錢糧亦欲蠲免爾等會同戶部將被災地方蠲免錢糧數目一併察明詳議具奏○庚申諭戶部朕惟自古帝王統一寰區懋宣德化必子惠黎元勤求民瘼俾幹止甯成家給人足而後世躋雍熙治登上理朕御極以來宵旰圖治未敢卽安念切民依思培邦本雖編氓漸得遂生而閭閻正資惠養欲使羣生樂利比戶豐盈惟頻行減賦蠲租庶萬姓得霑實惠前用兵以來河南湖北兩省民人轉輸供億勞費繁多特沛仁恩以昭軫恤所有康熙二十五年應徵地丁各項錢糧著予蠲免一半其康熙二十四年未完地丁錢糧亦著盡予豁除又直隸獻縣河間縣河間衛江南宿遷興化縣邳州高郵州鹽城縣山東鄒城縣魚臺縣地方今年

重罹水災小民艱苦亦應加恩軫恤所有康熙二十四年下半年二十五年上半年地丁各項錢糧俱予豁免爾部速行該地方官通行曉諭務使人人均霑恩膏以副朕愛育蒼生至意如有不肖有司官役借端蒙混反私行重徵者該督撫指名題參從重治罪如該督撫徇隱不行糾舉或被告發定行一併從重治罪爾部卽遵諭行○庚午九卿等議准原任山西巡撫穆爾賽應立絞得旨穆爾賽所承認贓數不符姑改爲監候秋後處決○壬申禮部尙書哈占以病乞休得旨哈占前任川陝總督不能實心盡職後值大兵進剿屢經奉旨催促始隨他人之後前往並未著有勞績乃稱捐軀思效晝夜拮据等語妄行陳奏殊屬不合著嚴飭行仍留任殫力供職以贖前愆○癸酉命扎薩克喇嘛垂木珠爾拉木扎木巴得木齊商南多爾濟副都御史拉篤祐等齎敕往諭達賴喇

嘛敕曰朕統馭宇內繼絕舉廢欲期咸底隆平厄魯特噶爾丹博碩克圖汗滅鄂齊爾圖汗時羅卜臧滾布阿喇布坦巴圖爾額爾克濟農等紛紛離散來至邊境竄迹於金塔寺賀蘭山等處乃巴圖爾額爾克濟農額爾德尼和碩齊等又以生計窘迫在鄂爾多斯毛明安吳喇忒甯夏等處妄行劫掠朕於此時不卽發兵勦滅者乃軫念鄂齊爾圖汗歷世職貢誠敬奔走是以寬宥其罪巴圖爾額爾克濟農等亦戴朕恩願依朕爲生屢疏奏請敕印前此朕旨諭厄魯特噶爾丹博碩克圖汗云巴圖爾額爾克濟農等如係爾所屬當卽收之不能朕另有裁度乃彼約以丑年春爲期如逾期悉惟上裁今逾期已數月矣天下太平惟伊等兄弟骨肉分離散處失所朕心殊爲惻然爾喇嘛素以惻隱之心度此眾生凡厄魯特諸貝子皆供奉喇嘛信崇爾法朕思羅卜臧滾布阿喇布坦

巴圖爾額爾克濟農皆鄂齊爾圖汗之苗裔也鄂齊爾圖汗於喇嘛爲護法久矣何忍漠視其子孫宗族至於困窮今朕欲將伊等歸併一處安插於可居之地以示興絕舉廢之至意爾喇嘛其遣使與朕使臣定期往會朕於此時卽遣大臣至所約之地偕爾使人前往○甲戌諭大學士明珠王等皆用紫韁乘騎或以紫韁濫給微賤之人乘用又其甚者遂至給與外省官員商賈等輩不待敝壞而更新騎用者至多大悖儀典良由未經定例以至於是王等旣束用金黃帶若騎用金黃韁則不得妄給微賤而等威辨矣其令宗人府禮部會同定例議奏○先是 上諭兵部國家武備不可一日懈弛舊例每歲必操練將士習試火礮爾部卽傳諭八旗都統等豫爲整備朕於十八日將親閱焉時喀爾喀土謝圖汗子多爾濟厄爾德尼阿海台吉等以貢在京請於理藩院尙書阿

喇尼轉奏曰臣等以朝貢而來聞 皇上大閱甲兵遠方之人幸逢盛典願一睹軍容 上曰從來撫綏萬邦在德教不在威武故

兵者不得已而用之今四海昇平偃兵不用然訓練士卒簡閱軍器所以修武備昭法制也喀爾喀台吉既請往觀可允具奏又有厄魯特固魯木錫台吉噶爾丹博碩克圖汗來使塔西蘭和卓等亦請往觀 上亦命隨往至是 上由午門出宣武門入旗都統各率所部將士擐甲胄佩弓矢建旗纛自灣子裏夾道分列至拱極城前鋒官軍自蘆溝橋夾道分列至王家嶺山麓其東則有排槍官軍其西則紅衣巨礮皆次第陳列 上乃登王家嶺升 御座軍中吹螺角者三發巨礮三既而排槍並發前後相繼聲絡繹不絕者久之且無不中的又命將士發紅衣巨礮於是八旗所列紅衣將軍及諸火器一時盡發凡二次聲震天地巨礮所擊樹侯

欄牆莫不應聲而倒是時阿海台吉及眾蒙古等皆驚懼失色甚有匍匐仆地戰慄不止者有頃阿海台吉少息語阿喇尼曰我等初見士馬精壯兵甲堅利已知 聖朝軍威無敵於天下今觀火器轟烈如此尤耳目所未睹聞愈覺驚心破膽矣 上命阿喇尼傳諭曰朕惟以寬仁撫馭欲使溥海又安家給人足近者悅遠者來此朕本懷也至兵爲凶器非可輕試第念古來世際承平不忘武備閱兵乃本朝常制耳無足驚歎也 上御行宮召扈從諸王內大臣及阿海台吉等賜食旋復御黃幄設布侯校射 上先射五發皆中次令諸王貝勒八旗善射者校射中的者甚眾 上將還宮阿海台吉奏請送 駕 上曰朕知爾意誠但今日勞頓其徑歸館舍○乙亥琉球國中山王尙貞遣使進貢方物部議如例賞賚得旨觀所賜琉球等外國恩賚之物甚菲於厚往薄來之道

尙未允協著內閣會同禮部察頒錫外國之例酌量增益所賞儀
物確議具奏○丙子大學士等奏河道總督靳輔按察使于成龍
來京臣等遵旨問河工事宜靳輔議開大河建長隄高一丈五尺
束水一丈以敵海潮于成龍議開濬海口故道兩人各執己見議
不盡一臣等與九卿俱從靳輔議通政使司參議成其範科道王
又旦錢珏等從于成龍議 上曰朕聞自宋以來河道不甚爲害
明隆慶間諸口故道始至淤塞近自康熙七年桃源隄潰決遂爲
七邑之患今兩人各持一說亦俱有理似皆可以建功但不知其
孰於民有益無害爾等可傳問高寶興鹽山江泰七州縣見任京
官此兩說孰是伊等係本地人所見必確若因產業有礙或徇私
不以實對雖掩飾一時將來朕必知之務令直言無隱○丁丑
上御懋勤殿大學士等以處決重囚疏請旨 上曰茲事重大人

命所繫雖經廷臣詳訊朕已矜減多人而情實各犯苟可生全姑令緩死朕與爾等詳議之賜諸臣坐 御案先設招冊 上一一詳閱諭大學士等爾等攜有招冊節畧摺子各取出比對因命大學士王熙學士牛紐執筆於應句者先句於摺子內有擬議未定者姑點之俟再議重犯六十六人讞詞一一覽畢 上諮詢詳慎至三乃命牛紐韓棻於 御案傍批紅所句者凡二十有九人上召大學士學士起居注官等至懋勤殿 上問學士徐乾學起居注官喬萊河工事喬萊奏曰從于成龍議則工易成百姓有利無害若從靳輔議則工難成百姓田廬墳墓傷損必多且隄高一丈五尺束水一丈比民間屋簷更高伏秋時一旦潰決爲害不淺矣 上諭大學士等朕聞河上河情非巨豐之產家堰之水減入高郵寶應諸湖由湖而至運河河隄決始入民田今

兩人建議皆係洩水以注海雖功皆可成畢竟于成龍之議便民且開濬下河朕欲拯救民生耳實非萬不可已之工也若有害於民如何可行于成龍所請錢糧不多又不害百姓姑從其議著往興工不成再議未遲○戊寅大學士等以翰林院侍讀喬萊等公議摺子進呈 上覽畢諭曰鄉紳之議如此但未知百姓如何濬河原以救民靳輔所請既與于成龍不同或有累百姓亦未可知宜遣滿漢大臣有識見者往詢土人詳閱形勢必期允洽民情有利無害方可舉行遂命工部尙書薩穆哈學士穆稱額速往淮安高郵等處會同徐旭齡湯斌詳問地方父老期於兩旬內回奏○刑部題叛犯侯滿英家奴僕應交內務府 上命發與戶部入官因諭曰嗣後反叛旗丁仍如例交該管衙門其奴僕俱發戶部入官著爲例○己卯諭領侍衛內大臣舅舅佟國維伯費揚古曰原

任都統鄂內大臣坤巴圖魯皆 太宗時舊臣效力年久前雖
軍中獲罪事非由己今罷職閒居朕心深爲憫惻俱授爲散秩大
臣二人俱年老衰邁能步履令其上朝如不能則聽其家居勿強
也爾等可卽宣召示朕優恤耆舊至意○乙酉諭大學士等今月
朔日食十六日月食且比日積陰無雪朕思天象稍有愆違卽當
儆戒修省或施行政事有未當歟或下有冤抑未得伸歟爾等傳
諭九卿詹事科道詳議以聞九卿詹事科道因入奏曰 皇上寬
仁御下勵精圖治凡於用人行政吏治民生莫不精詳周至民皆
遂生樂業乃猶有日月薄蝕積陰不雪之象是皆臣等才識闇淺
弗克稱職以上干天和今惟洗心滌慮實圖修省仰副我 皇上
鄙承天刑至意○大學士等奉命撰擬蠲免河南湖北及直隸山
東被水州縣錢糧諭旨進呈中有海宇昇平等語 上曰今四方

雖定民生未盡悅安朕宵旰不遑勤求閭閻疾苦每遇有利民生之事惟恐行之稍遲致民生失所孜孜不已庶幾漸見太平且古帝王已治益求其治已安益求其安朕深自省惕惟慮始勤終怠不克底於化成若遽謂昇平而泰然自足非朕勤求上理之初意也自後諭旨中凡此矜張盈滿之言勿復擬入

十二月丁亥朔四川提督何傳奏請武官亦應丁憂 上諭大學士等孝者治天下之本理應丁憂且武官久任非善事在昔唐朝藩鎮驕蹇跋扈皆由久典兵權之故耳丁憂之例既定自不致久任矣著九卿議奏○戊子諭大學士等朕昨召靳輔于成龍至廷將河圖一一詳詢又令二人各出己見互相論難朕又問以淮安揚州等地原係低窪瀦水遂致成湖彼處百姓儻遇年旱仍資湖水灌溉況地既屬窪下縱盡力決導能令水盡涸乎二人俱奏稱

不能盡涸朕意水勢稍減卽有益於民應依于成龍所言挑濬海口俾所瀦之水得以通流其有無利益之處不久便見但不知所需錢糧若干始可敷用王熙奏曰據于成龍奏稱錢糧不能豫行估計想從故道挑濬似不大費經營○九卿等議覆給事中楊周憲奏錢糧絲忽以下細數不應刪去其簡明賦役全書當停其刊刻應毋庸議 上顧吏部尙書達哈他等曰爾等之意皆同否達哈他奏曰錢糧事件臣不能洞悉但微細之數刪去則檔冊簡明似易查覈臣等今議將忽以下細微刪去所刪之銀不過數千兩數目不多臣等故同一議 上曰朕原不從所刪些微錢糧起見但論有益於民否達哈他奏曰臣等議將絲忽以上之數仍存忽以之數刪去如此則便於查覈吏胥不得作弊實有益於民九卿等出 上又顧問曾任有司科道錢珪任辰旦等奏言臣等任知縣

時頗有錢糧細數繁多檔案冗雜由部駁至藩司由藩司駁至州縣展轉駁查滋累民間吏胥藉此作弊若刪去忽以下細數實於民有益 上命如九卿議行○庚寅 皇子允禎生○內閣禮部遵旨議覆賞賚外國例朝鮮西洋荷蘭賜物素厚不必復增及暹羅王妃賞賜亦仍如常遵行嗣後琉球國王應增段三十疋安南國王增段二十疋暹羅國王增段十六疋凡表裏各五十疋吐魯番亦增段六疋從之○甲午宗人府禮部遵旨議覆土等應用金黃色馬韁其紫色馬韁原非定例當用應禁止得旨郡王之長子貝勒貝子著用紫色馬韁餘如議○戊戌山東巡撫張鵬奏曲阜縣顏氏地畝照孔氏例從輕徵糧以昭朝廷優恤聖賢後裔之意從之○己亥 上以歲暮致祭 孝陵啟鑾○庚子 上謁 孝陵至 仁孝皇后 孝昭皇后陵奠酒○辛丑 上詣 孝陵於

隆恩殿行大祭禮遣恭親王常甯祭 仁孝皇后 孝昭皇后

陵 上回鑾○癸卯 上還京師○甲辰以佛倫爲左都御史

由兵

部左侍

郎選 ○刑部題旗人史書等辱罵順天府府丞王維珍經王維

珍舉首應將史書等枷一月鞭一百 上諭大學士等旗下惡棍

辱罵職官如此輕處何以儆戒眾人著查康熙十八年定例呈奏

於是大學士等奏康熙十八年曾經九卿定議諸王及大臣僕人

有干預詞訟索取財物者其主知情從重議處僕人枷三月鞭一

百其主不知情僕人以光棍治罪 上曰此情最爲可惡著從重

治伊主一併察議此等事甚多舉首者少王維珍不顧情面舉首

可嘉著議敘勒德洪奏曰其主乃康親王傑書也 上曰朕止論

事之是非不論其爲何人也○是月免湖南武陵邵陽湘鄉旱災

山東濟甯州水災田租○是歲朝鮮琉球來貢○人丁戶口二千

三十四萬一千七百三十八田地山蕩畦地五百八十九萬一千六百二十三頃三十七畝有奇徵銀二千七百二十一萬六百四十九兩有奇米豆麥六百九十一萬二千二百一十三石四斗有奇草二百二十九萬二千二百八十七束茶十五萬九千三百一十五引鹽四百三十五萬六千一百五十引徵課銀二百七十六萬一千三百八兩有奇鑄錢二萬九千四百八十五萬一千四百八十有奇

臣王先謙敬編

臣周澹齋恭校

康熙二十五年丙寅春正月戊辰先是理藩院奏厄魯特巴圖爾額爾克濟農攜其屬七百八十人將至遣官往迎上曰巴圖爾額爾克濟農所屬亦限以二百人入關餘者留歸化城則見在噶爾丹之貢使可無辭矣茲當嚴冬之際行李牲畜盜賊可虞歸化城都統古睦德見以年節來覲可令速回監視著遣戶部理藩院司官各一員前往宣化府優給供應至是巴圖爾額爾克濟農至京朝見筵宴畢上以御服貂裘賜之○辛未上幸南苑行圍○壬申遣副都統馬喇等往督黑龍江屯田○甲戌諭大學士勒德洪學士麻爾圖曰者大兵往征鄂羅斯破雅克薩城釋鄂羅斯

不誅赦之使生還其時不並取尼布潮地者蓋以尼布潮地畫爲疆索使鄂羅斯不得越尼布潮界外聽其捕牲也今薩布素等奏言鄂羅斯復來城雅克薩地今當卽往征而滅之耶抑或緩之以待黑龍江墨爾根地將士移家定然後進兵爲宜耶令議政王貝勒大臣及與鄂羅斯之役彭春佟寶班達爾沙郎談同爾等會議以聞○雲南貴州總督蔡毓榮奏逆苗王騰龍等聚眾劫掠應行征剿 上諭大學士等苗蠻賦性樸實不敢生事止以地方該管官不克平情撫恤反需索馬匹金銀誅求無已不能供應遂生弊端耳前逆賊吳三桂亦因需索水西不遂貪欲捏造水西反叛竟自發兵剿滅盡取其利以爲己有今苗蠻之事恐亦類此○乙亥厄魯特巴圖爾額爾克濟農入見 上召近前諭之曰爾祖顧實汗於 太宗文皇帝朝輸誠進貢是時同達賴喇嘛來通款爾叔

鄂齊爾圖車臣汗當 世祖章皇帝時竭扃忠悃每年進貢請安

其土產白鷹以時來貢朕猶及見之夫貢物何足珍貴正鑒其誠

敬之心耳及爾等厄魯特內亂噶爾丹攻滅鄂齊爾圖車臣汗並

吞其眾遣使獻俘朕念前此鄂齊爾圖車臣汗勉效忱悃聞其破

亡且加憫恤何忍受之因諭來使卻其所獻俘獲頃者爾爲噶爾

丹擊敗奔來邊境將沿疆附近居民牲畜等物偷盜侵奪朕卽應

正爾犯邊之罪何難遣兵剿除但念爾昔時頗竭誠款爾復引罪

自首以迫於飢窮瀕死妄行等情奏請朕卽寬宥今若徙爾於邊

境內外不拘何地居之爾敢不懍遵特念爾祖願實汗爾叔鄂齊

爾圖車臣汗素效恭謹故俾爾絕者復繼散者復聚欲使鄂齊爾

圖車臣汗之孫羅卜臧滾布阿拉布坦與爾聚處爾等宜相與輯

睦善自安業至於爾等聚合與否在朕本無損益惟是朕爲天下

主凡在函蓋咸欲使之共樂太平朕茲諭旨自爾身及爾子孫當世世念之勿替○封安親王岳樂子吳爾占爲貝勒鎮國公蘇努子富爾金爲輔國公○壬午調傅臘塔爲兵部右侍郎

由刑右調

二月丙戌贈陝西陣歿驍騎校馬喇希四川陣歿參贊副都統擴爾昆世職○九卿遵旨議覆四川提督何傳請武官照文職丁憂一疏嗣後提鎮以下如奉特旨留任者應令在任守制其副將參將以下等官如係緊要地方缺該督撫提鎮題留者准其在任守制餘俱令解任守制得旨依議守制關乎孝道人子之心各宜自盡文武一體極爲合理閒有應留者候臨期酌定○丁亥以丹岱爲刑部右侍郎

由內閣學士遷

○禮部議准差往朝鮮國審事護軍統領

佟寶奏朝鮮國王李焯前屢次獲罪俱蒙 皇上宏恩寬宥理應

益加恪慎乃平日不將人民禁飭以致韓得完等二十八人違禁

越江採葭復擅放鳥槍將欽差繪畫輿圖官役打傷殊干法紀請將該國王罰銀二萬兩以儆疏縱從之○庚寅引見直省朝覲官上詳問各省條奏事宜及職銜履歷諭科道等官頃浙江按察使佟國佐奏飢民爲盜請寬減其罪天下焉有不飢不寒而爲盜者若以飢寒所迫爲辭將爲盜者竟可不坐罪乎藩臬條奏應以地方利弊關繫重大者入告今伊等所言大都皆職司之內平等事務非關緊要於地方亦未有裨益○辛卯吏部等衙門會奏直隸巡撫崔澄於康熙二十四年大計卓異永平府知府佟世錫查佟世錫聲名不好應照例革職該撫以應去之員反舉卓異應降四級調用從之○先是九卿等議准工部尙書薩穆哈學士穆稱額等往勘下河議海口暫停開濬得旨海口不行開濬則泛溢之水無歸濬之使水有所洩高郵等處淹浸田畝可以涸出令于成

龍薩穆哈穆稱額同九卿集議之至是九卿奏奉差大臣及該督撫親歷河干問河濱百姓僉謂挑濬海口無益應行停止 上問大學士等曰于成龍云何大學士等奏曰于成龍言欲開濬海口必修治串場河其費約百餘萬臣等議以此工果有裨益卽費至千萬亦所不惜今以百萬帑金嘗試於未必可成之工不若留此以備各處賑濟 上曰海口關繫民生自應開濬今九卿及于成龍等僉議停止且視今歲水勢如何再酌之○癸巳 上御保和殿直隸各省朝覲官員行禮鴻臚寺官宣讀 上諭諭曰國家三載考績原以崇獎廉善擯斥貪殘必吏治澄清庶民生安樂今當大計已嚴飭所司重懲貪酷餘俱如例降革其有眾論不孚是非失實者特黜一二以儆積玩姑准爾等仍服原官爾等平日官評賢否公論昭然若值會推輒鑽營奔競以圖僥倖倖居心先已不自

何以率屬莅民且凡朝覲之期每因仍陋習借端科派大小相循私通交際是察吏本以安民而反以擾民甚非朕激揚清濁至意嗣後務須洗滌肺腸勉圖自新毋貌承心違蹈常襲故國憲具存決不爾貸○甲午理藩院左侍郎明愛以老疾乞休允之○減廣

東海關徵收洋船額稅十之二○丁酉以于成龍爲直隸巡撫

由

理下河事務原任安徽按察使遷

副爾宸爲甘肅布政使

由兵部郎中遷

○理藩院郎中

滿丕奏遣索倫副頭目烏木布爾代等抵雅克薩城生擒羅刹鄂克索木果訊之云去歲尼布潮頭目宜番令大兵釋歸之額禮克謝率五百餘人復至雅克薩依舊址築城訊以糧米可食幾月云所獲足支二年 上諭今羅刹復回雅克薩築城盤踞若不速行撲剿勢必積糧堅守圖之不易其令將軍薩布素等姑停遷移家口如前所請速修船艦統領烏喇甯古塔官兵馳赴黑龍江城至

日酌留盛京兵鎮守止率所部二千人攻取雅克薩城並量選候
補官員及見在八旗漢軍內福建藤牌兵四百人令建義侯林興
珠率往○庚子諭大學士等近雲貴督撫及四川廣西巡撫俱奏
請征剿土司朕思從來控制苗蠻惟在綏以恩德不宜生事騷擾
今覽蔡毓榮奏疏已稔悉其情由蓋因土司地方所產金帛異物
頗多不肖之人苛求剝削苟不遂所欲輒以爲抗拒反叛請兵征
剿在地方官則殺少報多希冒軍功在土司則動生疑懼攜志寒
心此適足啟釁耳朕惟以逆賊剿除四方底定期於無事如蔡毓
榮王繼文哈占等身爲督撫不思安靜撫綏惟誅求無已是何理
也前出征雲南趙良棟將彼等過端幾至發露穆占之家人舉首
朕寢其議若此等尙多朕無不洞悉但事係已結朕不復究置之
寬宥至雲貴督撫居官殊無善狀或地處遼遠朕不悉知亦未可

定爾等將此諭旨傳示九卿詹事科道令其詳議具奏尋九卿等會議土司劫掠應敕該督撫剿撫並用請頒 上諭通行曉諭從

之○轉喇巴克爲理藩院左侍郎以穆稱額爲理藩院右侍郎由內

閣學○癸卯以傅拉塔爲陝西布政使由御史遷李國亮爲江蘇按察

使原任貴州按察使○甲辰纂修 太祖高皇帝實錄聖訓告成○丙子

賑山東郊城等五州縣饑○丁未諭吏部兵部我國家埽除逆孽

平定遐荒卽負山阻箐之苗民咸輸誠供賦封疆大吏自宜宣布

德意動其畏懷俾習俗漸馴無相侵害庶治化孚於遠邇近見雲

南貴州廣西四川湖廣等處督撫提鎮各官不惟不善加撫綏更

爾恣行苛虐利其土產珍奇貨藏饒裕輒圖入己意所未遂因之

起釁職爲厲階蠢爾有苗激成抗拒卽擅殺一二誑稱累百盈千

始贖貨以生端卽邀功而逞志藐玩因循殊負委任朕思土司苗

橫授官輸賦悉歸王化有何机隍互相格鬪無有甯居嗣後作何立法務令該地方督撫提鎮等官洗心易慮痛改前轍推示誠信化導安輯各循土俗樂業遂生亦令苗民恪遵約束不至侵擾內地居民以副朕撫馭遐方至意著九卿詹事科道會同逐一詳議具奏○以敦多禮爲內閣學士

由太常寺卿遷

○戊申 上幸南苑行圍

○己酉太常寺以文華殿告成經筵前一日例應祭 先聖先師於傳心殿或 皇上親詣行禮或遣官恭代請旨 上曰經筵大典於文華殿初次舉行先聖先師道法相傳昭垂統緒炳若日星朕遠承心學稽古敏求效法已漸近自然然後施之政教庶不與聖賢相悖其躬詣行禮以彰景仰之意○辛亥九卿等議覆入覲四川松威道王隲條奏四川柘木採運艱難應行停減 上曰蜀中屢遭兵燹百姓窮苦已極朕甚憫之豈宜重困塞外松木材大

可用者甚多若取充殿材卽數百年可支何必相木著停止川省
採運○工部右侍郎席特納以老乞休允之○壬子 上詣傳心
殿告祭 先聖先師○癸丑 上御經筵○甲寅裁陝西隴右道
臨洮府同知平涼府通判布政使司都事按察使司知事行都司
司獄平涼府照磨固原州同靜甯州州判甯州州同慶陽衛經
厯鞏昌府照磨三岔驛驛丞西津驛驛丞殺賊驛驛丞摩雲驛驛
丞

三月己卯朔直隸巡撫于成龍陛辭諭曰爾自居官以來廉慎端
方朕所素知今直隸地方關繫緊要一切利弊應興應革者甚繁
如何釐舉于成龍奏曰直隸地方以弭盜爲第一要務爲盜者倚
仗旗下名色或嚇詐或劫掠無所不爲有司明知而不敢深究嗣
後旗下有如前不法者臣當執法究治 上曰直隸旗下各莊人

戶不守法度爾須執法嚴治不得瞻徇顧忌朕留心民瘼外事無不周知卽如工部所用車輛係發價見雇今俱派取州縣如此積弊不止一端爾到任逐一查明奏聞爾固宜正己率屬廉潔愛民亦宜寬以濟猛勿過刻也且居官不善縱或漏網亦將禍及子孫爾須有始有終實心實事從國計民生起見盡力爲之于成龍辭出隨賜白金一千兩表裏二十端○丙辰戶部議覆入覲江蘇布政使章欽文奏國家首重錢糧藩司一省總匯起解批收若非釐剔有法則百弊叢生臣到任後卽將解批一項具詳撫臣檄行各屬凡州縣起解錢糧銀批同解銀存司堂批投撫署登記之後發司限日收掣當堂驗兌出具實收同批一併呈繳撫臣驗銷卽從撫臣衙門遞發該州縣存案其有批無銀並款項不符者詳請提究是以解支清楚並無纖毫淆濶臣思江蘇賦額繁重行之而效

則他省易行可知祈敕部通行各省一例舉行以清批收夙弊應如所請直隸各省一應起解錢糧俱照江蘇例舉行從之○禮部議准入覲廣西布政使教化新奏粵西土司僻處邊崗不識詩書不明禮義很悍成性請敕該撫諭令各土司官有願送子弟就近府州縣讀書者命該教官收納訓誨從之○戊午命巡城御史修理五城棲流所安插就賑流民○己未命纂修一統志○吏部議覆入覲廣東按察使胡戴仁奏粵東尚逆舊兵編入將軍上三旗者與粵民夙有恩讐訟獄迭起每委官審理兩造爭執不服若不設立專官鮮能彈壓惠州府郡小事簡見有同知通判二員請酌改一官爲理事廳查廣東原無理事員缺應毋庸議得旨旗兵駐防江甯杭州俱設理事廳官其西安荊州鎮江福州廣州等處均有旗兵駐防應將本省事簡地方官員內酌量改設理事廳官一

員○壬戌工部右侍郎金汝祥以不稱職解任○以丁煒爲湖北

按察使

由江西贛南道遷

○甲子調沙賴爲工部右侍郎

由倉場調

○丙寅

上幸玉泉山○丁卯禮部議准入覲湖南布政使張仲舉奏朱儒

程顥程頤張載邵雍朱熹各有專祠祈賜 御書匾額得旨前哲

有功聖學允宜表章著依議行○予故原任工部侍郎高辛傅祭

葬○戊辰轉陳一炳爲工部左侍郎以孫在豐爲工部右侍郎

由

林院掌院學士遷

○庚午召刑部都察院大理寺大小諸臣面諭曰刑曹

民命攸關國典所繫今見法司讞鞠刑獄或恐不得其情專事苛

刻夫人命關係重大必以中正之心行平恕之道使法蔽其事毋

縱毋枉必得真情始免屈抑若惟以深文爲能事銀鍊爲盡職及

獄詞既具奏牘旣成卽反復推詳欲求其更生之路亦甚難矣朕

於爾諸臣所上章奏有情可矜疑罪未允協者皆駁令覆審嗣後

其各體朕懷殫竭心慮矢慎矢明以副朕祥刑之意朕批閱史冊

採擇歷代賢臣慎刑事蹟書之簡牘內閣三法司官其詳加省視

又諭刑法者專以禁戢兇暴若豪強奸慝固難寬宥其貧賤愚昧

者畧施寬貸亦未嘗不可耳○癸酉調蘇赫爲總督倉場侍郎由戶

部調○以田慶會爲福建按察使山河南河○甲戌諭吏部江甯巡

撫湯斌在講筵時素行勤慎朕所稔知及簡任巡撫以來潔己率

屬實心任事允宜拔擢大用風示有位特授爲禮部尙書管詹事

府事○乙亥 上幸玉泉山○以張英爲翰林院掌院學士兼禮

部侍郎由翰林院○禮部奏 皇上御門聽政嗣後令滿漢科道

官各一侍班糾參失儀官員從之○丁丑調傅臘塔爲戶部右侍

郎由兵○戊寅 上幸南苑駐蹕○庚辰 上還宮○吏部等衙

門議覆左都御史佛倫奏三年大計令各省藩臬齋冊入覲卽將

地方情形及興革利弊具疏陳奏查藩臬專理一省錢穀刑名伊等來京朝覲之後委員代理或致錢穀刑名款項舛錯稽遲亦未可定雖有條奏不過細事塞責況道途供應或不肖官員借端私派嗣後大計請將各省藩臬及各府佐貳官員入覲之例通行停止照慶賀 萬壽表章例每省委道官一員齎冊入覲至官員賢否去留止以督撫文冊爲憑造五花冊三本分送吏部都察院吏科其藩臬二司所造冊籍分送各部院科道司等項亦請停止以省無益繁費均應如所請從之○甲申調丹岱爲兵部右侍郎

刑由

右調

夏四月乙酉朔命尙書阿喇尼等往喀爾喀七旗泣盟賜喀爾喀七旗汗濟農台吉等敕曰朕統御寰區中外一體務使交相輯睦共享昇平乃爾右翼扎薩克等內自相亂兄弟人民多歸左翼其

左翼扎薩克兄弟人民亦有歸於右翼者爾等以兄弟之親互相吞併異日必致交惡生亂朕心惻焉康熙二十三年會頒敕於達賴喇嘛議共遣使諭和爾等而達賴喇嘛亦謂朕俯念道法慈憫眾生有如父母意甚善也特遣噶爾丹西勒圖前來朕亦命尙書阿喇尼台吉巴忒馬什畢力克圖喇嘛阿齊圖綽爾濟等與之偕往爾汗濟農台吉等當仰體朕意及達賴喇嘛之心盡釋舊怨將兄弟人民各歸本扎薩克令其和協照舊安居不但仰副朕命與達賴喇嘛之意卽爾七旗永無離散之苦爭鬪之害福祿所綏亦且無疆矣是時喀爾喀右翼扎薩克圖汗歿其子噶爾旦台吉請襲父職允之並命阿喇尼因便致祭○丙戌免江南徽州廬州鳳陽府屬逋賦○丁亥調趙士麟爲江甯巡撫金鉉爲浙江巡撫由福建

調建

○己丑調噶爾圖爲刑部右侍郎

由盛京刑部侍郎調

○朝鮮國王李焯

奏臣忝守外藩奉職無狀從前邊民屢越疆界觸犯憲典輒蒙恩宥恒懷感懼時加嚴飭不意邊地奸民見利忘生冒禁探邊其罪已不容誅況將繪畫輿圖官役放槍傷害致煩遣官降敕嚴加儆責臣惶恐震越無地自容謹遵旨會同敕使將各犯韓得完等二十八名嚴行鞫訊並按律擬罪恭候 聖裁得旨三法司覈擬具奏○庚寅諭吏部兵部封疆文武大吏當用兵征剿時固在智勇兼優亦重清廉律已原任鑾儀衛鑾儀使趙良棟前值逆賊盤踞漢中首先倡率入川於漢中成都等處效力剿賊勞績昭著復領兵直抵雲南攻克省城之後獨能恪守法紀廉潔自持深爲可嘉今已衰老解任著復其勇畧將軍兵部尙書兼都察院右副都御史總督原銜以示眷注之意○諭兵部副都統郎談班達爾沙馬喇諳悉地形令赴黑龍江軍前參贊軍務○癸巳以張仲舉爲福

建巡撫

由湖南布政使遷

○添設盛京戶部員外郎二漢字主事一○贈

陝西死事平逆將軍都統畢力克圖參贊副都統阿爾瑚世職○

甲午諭禮部翰林院自古帝王致治隆文典籍具備猶必博採遺

書用充祕府蓋以廣見聞而資掌故甚盛事也朕留心藝文晨夕

披覽雖內府書籍篇目粗陳而裒集未備因思通都大邑應有藏

編野乘名山豈無善本今宜廣爲訪輯凡經史子集除尋常刻本

外其有藏書祕錄作何給值採集及借本鈔寫事宜爾部院會同

詳議具奏務令搜羅罔軼以副朕稽古崇文之至意○丙申吏部

奏陝西巡撫鄂愷於陝西大計冊內將不謹之布政使席格註入

優等應將鄂愷降四級調用從之○丁酉予故原任文華殿大學

士兼吏部尚書黃機祭葬諡文僖○辛丑以阿禮瑚爲盛京刑部

侍郎

由祭酒遷

○壬寅直隸巡撫于成龍奏直隸每辦解狐皮改爲折

色 上曰地方採買狐皮一倍費至十倍故百姓困苦此後俱著
停止應用狐皮令戶部在京採買○癸卯以圖爾宸爲陝西巡撫

由甘肅布
政使遷

○改四川松威道爲松茂道移駐茂州○戊申吏部奏

翰林院掌院學士缺開列詹事尹秦等補授 上曰翰林院學士
職任關係最重必學行兼優方爲允當滿漢學士得人則詞林觀
摩興起咸勤學砥行人材成就有裨治道匪淺曩喇沙里居是官
學問品行詞林至今追述之後來者俱不能及朕觀尹秦品有餘
而才不足任以詹事則相宜若用爲學士恐辦事不甚敏捷庫勒
納任此職時較他人爲優通政使葛思泰似亦可用可將此二人
酌議來奏○以李輝祖爲四川布政使原任湖北
布政使○己酉裁四川
成都營都司僉書二把總二永甯城守中營遊守把總八○辛亥
上幸玉泉山○調庫勒納爲禮部左侍郎管翰林院掌院學士

事由督捕
侍郎調

○兵部等衙門議准直隸巡撫于成龍奏順永保河四

府旗民雜處盜警時聞非力行保甲不能甯謐向例地方各官無
管轄屯撥什庫之例各旗都統等官又遠在京城竊恐屯撥什庫
不能嚴束旗丁及本身窩盜爲盜不法等項難以稽察應將各莊
屯旗丁同民戶共編保甲令屯撥什庫與保甲鄉長互相稽察如
旗丁居民犯法許地方各官一體申報該撫該都統究治從之○
壬子裁河南河北守道○癸丑禮部奏頃朝鮮國陪臣鄭載嵩等
以察議奸民韓得完一案爲伊國王辨冤具呈臣部查朝鮮僻處
東服叢爾一隅當念累朝興復殊恩撫循至德恪守藩翰庶免隕
越顧其君懦弱其臣恣肆積有重愆應加嚴治 皇上悉從矜宥
去年更有奸民韓得完等違禁採獲擅放鳥槍殺傷官役一案
皇上始遣大臣嚴訊猶念小民犯法其主或未之知僅以約束不

嚴劄綴示傲乃陪臣鄭載嵩妄爲其主求寬無禮已甚臣等詳閱情詞指摘謬戾不止一端濫引經史尤多狂悖果有冤抑該王分屬外臣應上章自明乞哀祈請豈有卑賤不告其君而輕弄筆端橫開禍始法在有司必無可赦相應將鄭載嵩等嚴拏發與該國王從重治罪並將此情一一傳與該國王知悉得旨鄭載嵩等免其嚴拏餘依議

閏四月丙辰 上幸南苑行圍○戊午諭大學士明珠等居官清廉如于成龍者甚少世間全才未易得但能於性理一書稍加觀覽則愧怍之處甚多雖不能全依此書以行亦宜勉強研求明晰義理若止泥辭章字句有何裨益○調席柱爲督捕侍郎由刑○以塞楞額爲甘肅布政使由郎中遷○己未諭翰林院掌院學士庫勒納張英等爾等每日將講章捧至乾清門豫備詣講筵行禮進講

爲時良久妨朕披覽功著暫停止春秋禮記朕在內每日講閱其詩經通鑑講章俱交與張英令其齎至內廷○贈湖廣陣歿二等侍衛勒德善世職○庚申增設黑龍江將軍衙門滿字筆帖式二○禮部等衙門遵旨議覆購求遺書應令直隸各省督撫出示曉諭如得遺書令各有司會同儒學教官轉詳督學及該督撫酌定價值彙送禮部其無刻板者亦令各有司雇募繕寫交翰林院進呈有願自行呈送者交禮部彙繳得旨自古經史書籍所重發明心性裨益政治必精覽詳求始成內聖外王之學朕披閱載籍研究義理凡厥指歸務期於正諸子百家泛溢詭奇有乖經術今按訪藏書善本惟以經學史乘實有關繫修齊治平助成德化者方爲有用其他異端詖說概不准收錄○壬戌以黃性震爲湖南布政使

由廣西按察使遷

○癸亥轉嚙爾圖爲刑部左侍郎以敦多禮爲刑

部右侍郎

由內閣學士遷

○甲子浙江提督陳世凱奏

上諭十六條訓

飭臣民周詳盡善普天率土應一體講讀以昭一道同風之盛今各省文職已於月吉宣講獨武臣未有講讀定例臣思皇上以孝治天下培植倫常特允武職丁憂以端風化臣請敕直隸各省將軍提鎮諸臣率所屬營伍照文職例一體講讀庶荷戈將士咸知名教綱常永無匪行至各省土司亦屬武職尤宜亟爲講讀更徵遠邇同風教化大行之治下九卿議尋九卿議如所請得旨自古武職名臣如郭子儀李靖等皆讀書明理熟諳經史乃能保守功名克全臣節嗣後武職官員應閱覽書籍講明忠孝大義著該管官勤加勸諭○倉場侍郎馬如驥緣事革職○乙丑禮部左侍郎鄂哈以病乞休允之○刑部等衙門奏朝鮮國韓得完等二十人入犯禁採淺鳥槍打傷繪輿圖官役應將爲首韓得完等六人

及爲從金大成等二十二人俱擬立斬其約束不嚴失於覺察之
咸鏡道節度使尹時達平安道觀察使朴尙咸鏡道觀察使李秀
彥三水郡守李觀國等應各降革調用有差得旨韓得完等六名
著處斬立決金大成等二十二人俱從寬免死減等發落餘如議
○丁卯戶部左侍郎王鴻緒以本生母故奏請回籍治喪允之○

戊辰以葛思泰爲內閣學士

由通政使遷

○庚午調穆稱額爲禮部左

侍郎

由理藩院調

○辛未以蔡毓榮爲倉場侍郎范承勳爲雲南貴州

總督

由廣西巡撫遷

○雲南貴州總督蔡毓榮奏威甯逆苗王騰龍等擅

兵劫殺經臣題明撲剿迫兵圍攻時彼棄寨宵遁臣卽檄令土官
拏獲應請正法懸示得旨這案著新任總督范承勳詳審確議具
奏○甲戌禮部尙書管詹事府事湯斌陛見 上曰天下官有才
者不少操守清謹者不多見爾前陛辭時自言平日不敢自欺今

在江蘇潔己率屬實心任事克踐此言朕用嘉悅故行超擢爾其勉之 上歷詢吳中年歲風俗並地方吏治民生縉紳居鄉若何又問下河開海口事如何湯斌奏曰 皇上命尚書薩穆哈侍郎穆稱額等與總漕徐旭齡及臣詢問下河民情臣等徧歷海口各州縣人眾言雜不能畫一卽州縣水道海口亦不相同大約其言以開海口積水可洩但今年歲荒歉四分工銀恐不足用惟高郵興化之民間築隄開河恐毀其墳墓廬舍甚言不便部臣公議以築隄取土艱難工必不成且毀人墳墓廬舍非 皇上軫念民生之意而工程浩大恐多費帑金不能奏績不如暫停爲便臣與徐旭齡議以目下徧地皆水工力難施暫停未爲不善遂同具題但念此事乃 皇上巡狩江南親見民間房屋淹沒水中痾瘵念切隨命大臣相視海口簡選賢能開口洩水眞堯舜之心今議暫停

則可若竟中輟非臣子所敢擅議且上流之水滔滔而來下流無
一去路不但民闢田地水無涸期且恐城郭人民將有不測之患
如去年興化城內水深數尺萬一再遇水災一城付之巨浸臣等
何所逃罪若云開海口則水遂盡涸臣固不敢爲此言但水有去
路開一丈則有一丈之益開一尺則有一尺之益使泛溢之水漸
去則舊日湖河之形可尋再加疏濬築防工夫自有次第然舉事
當念民生尤當重國計若多費帑金而水不能盡涸非長策也請
毋多發帑金止於七州縣錢糧中酌量款項暫停一二年解留
爲修河之用此外再行設法總之以本地民力本地錢糧開本地
海口心旣專一工不誤用不作大舉不多設官漸漸作去當有成
效此意向會與薩穆哈等言之○乙亥召禮部侍郎穆稱額問曰
昨湯斌奏稱前會議開濬下河時會向薩穆哈等言若將下河高

處挑濬使積水漸歸於海於民亦稍有益等語爾等回京時何以並不奏聞穆稱額奏曰臣等至江南地方與總漕徐旭齡巡撫湯斌同至河干看視又傳問七州縣民皆云此水漫決日久今欲開濬海口其事甚難故臣等公議暫停其挑濬下河高處使積水漸歸於海等語湯斌並未向臣言之又召問尙書薩穆哈奏曰臣等與徐旭齡湯斌會同踏看海口傳集七州縣民問時百姓各就地方情形而言臣等因其語言不一遂令每州縣派出通曉事體者十人於淮安集問皆言不便挑濬臣等以開濬下河所費不貲事關重大故議暫停至湯斌等挑濬下河高處使水歸海於民亦稍有益等語聞談時誠有之並非公同商榷時之語也 上又問曰今爾等意謂此河可以開濬否薩穆哈奏曰大隄恐不能築若將下河高阜處陸續挑濬使水漸入於海似亦可行 上曰著再議

○諭大學士等學士徐乾學張英學問淹通文章事務著留辦理

以後開列巡撫不必列名○轉董訥爲戶部左侍郎以胡昇猷爲

戶部右侍郎

由左副都御史遷

○吏部等衙門遵旨會推廣西按察使缺

據吏部侍郎胡簡敬保舉江南淮揚道高成美擬正湖廣下荆南道沈志禮擬陪得旨凡職任緊要官員奉旨會推原期從公保舉

務得眞才有裨官守且官評賢否關係吏治民生若以本地方人

推舉本省官員必致瞻徇滋弊前已經屢諭申飭甚明今胡簡敬

以淮安府人推舉淮揚道高成美殊屬不合著嚴加議處九卿等

不加詳慎草率擬推亦屬不合著通行申飭○丙子以王起元爲

廣西巡撫

由內閣學士遷

○賑江南鳳陽徐州饑○戊寅子故致仕刑部

尚書喀爾圖祭葬

五月甲申朔諭三法司衙門朕惟自古帝王撫御羣臣百姓政教

修明治化洽暢與其繩以刑罰使人苟幸無罪不如感以德意俾民蒸蒸向善不忍爲非書稱協和萬邦黎民於變時雍又稱臨下以簡御眾以寬唐虞盛時從欲風動其效章章如是朕嘗心慕隆古力行教化冀以感發天良偕之蕩平正直之道但爲風俗頹弊明罰敕法國憲不可以已雖嘗屢行矜恤絕去煩苛終思尙德緩刑迺爲至治之極軌自康熙元年以來中外臣民習染澆風爭事詐僞公行賄賂貪冒營求因緣請託作奸犯科頑鈍者恬弗知恥奸黠者督不畏法以致是非乖謬綱紀凌弛朕親政以後洞悉奸弊加意釐剔振飭憲章務使散律干紀之眾莫能匿隱法無旁貸人無遁情庶幾禁遏頑豪杜塞僥倖近見罹於罪罟者漸覺減少但革面未能革心畏罪不如知恥原夫立法之意本欲使人難犯今因法令嚴密輒思苟免苟免之心切則彌縫之弊深羣心日夕

恐懼不甯巧僞滋多亦未可定今欲崇尚德化務存惇大蕩滌邪

穢一切令之自新除前審擬完結各案及關繫宮殿陵寢河道

工程侵欺正項錢糧不議外內外見經發覺一應枉法得贓行賄

與受人員仍革職止免擬重辟照例定罪追贓其此等未經發覺

免罪有以諭前事參奏訐告者一概不准自諭以後中外臣民須

洗心易慮省改前非守法奉公敦厲廉恥以副朕使人寡過之至

意再有干犯白難曲宥至於旗下閒散官員人等及民間豪惡黨

類並無職任乃攬說公事交結衙門妄行訛詐賄屬關通實繁有

徒朕皆稔悉嗣後益當恪遵法紀勿蹈故轍如怙終不悛發覺之

時從重治罪決不寬貸爾法司卽通飭內外大小各衙門八旗及

內府佐領曉諭知悉一體遵行○乙酉以徐元珙爲左副都御史

由通政使遷徐廷璽爲內閣學士由內閣侍讀學士遷○丙戌以覺羅孫果爲理

學士

藩院右侍郎

由左副都御史遷

○以張永茂爲廣西按察使

由江南江安糧道遷

○

丁亥敕直省嚴禁淫祠濫祀從禮部尙書湯斌請也○吏部右侍

郎胡簡敬以違例舉淮揚道高成美降二級調用○辛卯諭新授

廣西巡撫王起元前任巡撫郝浴范承勳居官有聲爾繼其後殊

難見長但於伊等善政便於民者踵而行之其錯誤處亦當改正

勿得紛更成法至苗蠻未嫻禮法尤宜撫循得宜向日武職各官

因彼愚蠢妄加操切或致生事邀功爾須訪察情弊嚴行禁止○

甲子以席珠爲左副都御史

由御史遷

○丁酉調董訥爲吏部左侍郎

管右侍郎事

由戶左調

○給浙江福建江西湖廣陝西陣歿副都統阿

喀尼等五十二員世職○宗人府奏鑲藍旗佐領委署參領覺羅

薩克素出征浙江陣亡應照例贈以拖沙喇哈番世職得旨薩克

素堅守黃巖因參將武灝私通逆賊城陷陣亡深爲可憫著加贈

拜他喇布勒哈番○己亥 上幸玉泉山○辛丑子故原任太子
太保保和殿大學士兼禮部尚書加贈太子太傅魏裔介祭葬○
癸卯調胡昇猷爲禮部左侍郎蔣宏道爲戶部右侍郎○丙午御
史敦拜奏關差缺額處分例輕以致拖欠日重應嚴定處分則例
並賠補限期 上曰關差缺額處分自有定例若法令太嚴必致
苦累商賈所奏無益不准行○己酉以徐乾學爲禮部右侍郎

閣學
士遷

六月乙卯吏部以湖北布政使王定國故員缺開列湖南按察使
范時秀廣東按察使胡戴仁得旨胡戴仁升補湖北布政使范時
秀著來京以旗缺用○澤卜尊丹巴胡土克圖遵諭覆奏曰臣自
幼皈達賴喇嘛之教叨澤卜尊丹巴之名普度爲心闡揚佛法息
列辟之爭救生民之苦扎薩克圖汗之子孫屬裔前已陸續給還

餘者正在察覈今蒙 聖慈念喀爾喀七旗不睦遣使於達賴喇嘛而達賴喇嘛亦遣噶爾璽西勒圖爲使赴盟諭臣亦至盟壇共議其事臣當遵旨同赴盟所竭誠公議以仰副 聖懷奏入 上命移文尙書阿喇尼噶爾璽西勒圖等知之○丙辰諭大學士等目今天早有蝗恐政事或多缺失民間疾苦有不能上達者卽傳集九卿問之俾各抒所見奏聞九卿等皆曰政事以愛民爲本愛民莫大於蠲租今 皇上凡遇直隸各省水旱饑荒蠲免征賦雖數百萬亦所不惜小民霑實惠矣愛民莫要於恤刑 皇上每遇關繫人命之事其難其慎詳審再三務得實情期於平允亦無有冤抑之人矣至於用人尤行政要務 皇上每用一人必加詳慎務使人與職稱黜陟賞罰無不允當政事豈有闕失間有水旱亦天行時令使然皆由臣等奉職無狀所行未當致干天和今公議

在京重囚 皇上特遣大臣清理在外重囚亦宜分遣大臣會同

督撫一體清理又各省常平一倉須多積米石以備賑救之用洵
爲救荒良策 上曰朕自卽位以來二十餘年凡民間之事留心

體訪稍知情狀古人不言救荒而言備荒故三年有一年之蓄九
年有三年之蓄雖閒值水旱小民不致失所去歲可謂豐年設今
歲不登卽致饑饉總由素無蓄積耳卽常平一倉積米太多亦易
朽爛若臨時令有司捐貸則又不可縱有良法奉行不得其人終
屬無益苟得良有司視民如一家痛癢相關始克有濟耳○丁巳
以郭棻爲內閣學士由詹事遷○戊午先是 上命大學士等以開濬
海口事傳問九卿及淮揚所屬之在京官員至是大學士等覆奏
臣等遵旨問九卿及淮揚等處見任京官喬萊等據喬萊等云積
水須有去路開一尺有一尺之益開一丈有一丈之益雖低窪之

地未必盡涸而諸壩所減之水淹沒田地斷能涸去儻得實心任事爲國爲民之人自然成功七邑錢糧有限又因災傷蠲免畢竟皇上發帑金救民更速等語據九卿云先薩穆哈穆稱額前往相度海口以水勢甚大難以開濬因議暫停湯斌原任江甯巡撫所見必確今稱開海口有益故復議應開 上曰眾議共稱應開薩穆哈穆稱額何以爲不可彼但憑信高成美之言自己全不會詳察耳此事必須委用得人方可成功孫在豐有才著發內帑二十萬兩前往督修功若可成再酌量動支正項錢糧○戶部議覆四川巡撫姚締虞奏四川鄉紳應回原籍得旨所奏甚是四川土廣人稀若居官者盡留他省則川中人益稀少愈致荒蕪矣著如所請行○己未命直隸督撫錄囚○辛酉工部奏參河道總督靳輔修理河工已經九年並無成功虛糜錢糧應交該部嚴加議處

上曰河工重大一時不能成功卽行處分或另差人修理恐致

貽誤且俟一二年後看其若何著九卿會議具奏○甲子贈死事

合浦知縣金世爵官廕○丙寅吏部奏故廣西巡撫郝浴先因那

用錢糧革職康熙二十四年五月會奉特恩寬免今伊子進士郝

林援例呈請開復原官應無庸議得旨郝浴准追復原官○戊辰

革工部尙書薩穆哈禮部左侍郎穆稱額職以差往河工詢問挑

濬海口回奏失實也○以沈志禮爲廣東按察使白湖廣下荆南道遷○癸

酉賑江西上饒等八縣饑○甲戌九卿遵旨議覆河道總督靳輔

應革職留任 上曰爲人臣者議論國家之事當執中公論據朕

觀之與靳輔善者爲之稱美與靳輔不善者言其過失大臣等似

此挾私意縱偏論朝廷大事欲望其修舉得乎靳輔一人去留有

何關繫但河務甚要若另補一人必塞減水壩減水壩一塞則河

隄萬不能保爾等可有兩全之良法否九卿等奏曰皇上不惜數百萬金錢原爲運道民生起見自修築以來運道無阻止因減水壩所洩之水民田稍有淹沒今皇上又發帑修築河上遙隄幫築高家堰復遣部臣前往疏濬下河民生自可樂業若目前竟開減水壩恐一時潰決受害重大俟河底漸漸刷深之後減水壩方可不用此外並無別法可行上曰爾等意見皆同否禮部尙書湯斌奏曰臣原不知河道情形因舊年奉旨往徐州一帶看視河形見減水壩太多舊時止有四處今增至三十餘所目前若竟行堵塞恐黃河衝決隄岸民田仍受其害若不行堵塞恐水勢分散河流緩弱則河底漸高運道有礙臣愚欲將減水壩稍築加高若水大仍可分洩水小俱使歸道則河底日逐刷深水無泛溢之患減水壩亦漸可堵塞矣工部尙書杜臻奏曰築隄開減水壩原

是古人成法但古人先開引河使有所歸不至漫溢民田今靳輔但開減水壩未開引河此民田所以淹沒也尋大學士等奉 上

諭河務甚難靳輔易視之若遽議處恐後任者益難爲力今暫免

其革職仍責令督修○乙亥以佛倫爲工部尙書由左都御史遷○刑部

左侍郎高爾位丁母憂令離任守制○敘浙江福建江西湖廣陝

西廣東廣西雲南軍功授征南將軍賴塔都統趙璉副都統馬錫

泰等七百六員世職有差○丁丑以柴望爲湖南按察使由陝西

遷○戊寅以阿蘭泰爲左都御史由吏部左侍郎遷○辛巳先是陝省用

兵時以漢中地方緊要撥西安滿洲漢軍官兵各一千名戍防後

四方蕩平部議將所撥官兵撤回其半仍留一千名輪班戍守至

是西安將軍希福等以漢中棧道崎嶇行走不便更番往返民人

遞送勞苦請一併撤回部議不准 上曰蕩平以來漢中駐防原

屬無益朕不忍使兵民交困其輪班戍守及永遠駐防俱令停止